

Fit autem primo atramentum futorium, quod vulgo *Vitriolum* vocant, deinde ex eo excoquitur aliquid Plumbi & Argenti. Perhibent autem Metallum Goslaræ sic natum. Quidam homo Nobilis Equum cui nomen erat Ramelus in Monte ramo arboris adligavit. Is ungulis, quibus ferreæ soleæ inductæ, terram quatens ac verrens, reconditam Plumbi nigri venam integumentis nudavit, non aliter ac Pegasus alatus, ut Poetæ fingunt, ungula saxum feriens, Fontem aperuit. Ut autem Fons iste ex eo nominatur Hippocrene, ita Montem hunc Saxones Ramelum vocarunt, qui hodie maxime floret, atque admirabilem Plumbi copiam supeditat. Reperitur & Plumbaginis quæ Græcis *μολύβδαίνα* vulgo *Lootærde*: & *Pyritarum*, *Viersteenen*, tanta copia, ex quibus Plumbum nigrum excoquitur, ut Mons quidam totus pene ex his constare videatur. Eius urbs primaria *Halla*, etymologia Græca, five ut Goropius non Græca sed Cimbrica derivatione a Salis proventu nominata: quemadmodum & *Halla* Suevica, aliæque urbes cognomines. Et in Armenia *Halis* fluvius, Græca voce *salsus*, ut Straboni placet. Ita *Halla* ad *Salam* non ignobile Saxonæ flumen, a Salis proventu nomen habere putamus. Cujus quidem Salis Fontes, admodum fructuosi & salutares primum inventi sunt ante Christi natalem a Wendis, quos *Hermunduros* vocamus, quorum ubertas, ubi vicinis gentibus innotuisset, haud secus, quam aureis Fodinis, magnis conatibus, iis insidiati fuerunt. Nunc *Halla* administratoris *Madeburgici* Marchionis *Brandeburgensis* sedes. Ad Inferiorem Saxoniam referuntur *Ducatus Lauwenburgensis*, *Lunenburgensis*, *Bruswicensis*, ac præterea etiam *Ducatus Meckelburgicus*. In Ducatu *Luneburgensi* est *Luneburgum*, Civitas celeberrima, sic dicta, vel ab Idolo *Lunæ*, quod Monti *Calcis* nomine insignito quondam impositum fuit: vel a fluvio *lo* præterlabente, nunc *Elmena*, *die Almenow* quasi *Elven Ow* ab undecim rivulis in eum fluentibus dicto olim *Luno* vel *Lunow* vocato, ab *Iside*, ut fabulantur, illac iter faciente ad *Ganbrivium* agnatum. Urbs est munitissima, cincta fossis & vallis, forma ejus fere quadrata: Salis fonte ditissimo beata. Hæc enim præcipua Civium negotiatio est, quam terra marique in longinquas exportat regiones. Majorem tamen ejus partem *Hanburgenses* Mercatores coemunt ac magnum quæstum inde faciunt. Templum *Augustanæ* confessioni addicta sex habet: quibus additum *Nosocomium*. Tota communio distributa est Romano more in Cives, cum patritios, tum plebeios, & inquilinos. Viget in ea ac floret optima politæ ratio, Studia literarum, Iustitia, Pax & Concordia inter Clerum & Gubernatores Reipublicæ quorum summa potestas est penes patritios. Reliqua Opida, ne sim prolixior, prætereo: Quoniam etiam aliquid de *Ducatu Meckelburgensi*, quem *Tabulæ* titulus repræsentat, dicendum est.

Ducatus Megapolensis.
Situs.
Soli fertilitas.
Animalium
varietas.

Ducatus Megapolensis, vulgo *Meckelburg*, olim pars fuit Provinciæ atque Domini Regum *Vandalicæ* Mari adjacens *Baltico*; nunc est ex præcipuis Germaniæ Ducatibus, & Imperii Membrum; Conjacent illi, qua *Oriens Pomerania*: qua *Occidens fl. de Elve* vulgo dictus: ad Meridiem habet *Marcam antiquam*: ad Septentrionem *Mare Balticum*. Regio fertilissima est, Frumento, Pomis, Ligno, Piscibus abundans. Varii generis videre est ibi Animalia, magnamque Iumentorum, Pecudum & Ferarum copiam. Cate-
rum *Arbertus* Regio stemmate prognatus & in aula *Caroli Magni* aliquandiu versatus, impetravit Imperatricis